



Inatsisartunut Ilaasortaq, Sofia Geisler
Inuit Ataqtigiit
/Maani

**Kuannersuit pillugu § 37 naapertorlugu apeqquteqaammut nr. 2018/269-
imut, 12.10.2018, akissut**

Ulloq: 26-10-2018
Suliap nr. 2018 -
19462

Asasara Sofia Geisler

- 1. § 37 naapertorlugu apeqquteqaatinnut akissummini nr. 255-imi
Naalakkersuisut allapput mingutsitsisoqassagaluarpat
taarsissussaataasooq tassaasooq GME. Akissummi ersinngilaq
taarsissussaataalernermit piffissaq qanoq sivisutigisooq
pineqarnerooq.**

Postboks 930
3900 Nuuk
Tlf. (+299) 34 68 00
E-mail:
asn@nanoq.gl
www.govmin.gl

GME taarsissussanngortitaassappat tamanna qanoq sivisutigisumik atuutissava?

GME pisinnaatitsissummik pigisaqartut, aallaaviatigut Kuannersuarni aatsitassanik uranimik akulinnik piiiaanissamut akuersissut malillugu ingerlataqarnermut atatillugu mingutsitsinerup malitsigisaanik annaasaqarnermut taarsiinissamut, akisussaasuusaaq. Akisussaaffik taanna akuersissutip atorunnaareernerata kingorna aamma atuuppoq. GME pisinnaatitsissummik pigisaqartut, piiiaanissamut akuersissut malillugu piiaanermi ingerlatassat aallartinnginneranni, ilaatigut matusinissamut pilersaarummik suliaqartussaavoq. Ilaatigut aatsitassanut ikummatissanullu inatsimmi § 43 malillugu tamanna pisussaavoq. Matusinissamut pilersaarut Naalakkersuisunit akuerineqartussaavoq. Naalakkersuisut akuersissuteqarnermi ilaatigut iliuusissat suut GME-p pisinnaatitsissummik pigisaqartut, akuersissutip atorunnaarneranut aammalu aatsitassarsiorfiup matuneranut atatillugu, iliuuserissanerai, pillugu atugassarititaasunik aalajangersaassapput. Naalakkersuisut tassunga atatillugu ilatigut pisinnaatitsissummik pigisaqartoq, akuersissutip atorunnaareernerata aammalu aatsitassarsiorfiup matoreernerata kingorna, piffissami aalajangersimasumi sumiiffimmi avatangiisini alapernaarsuissasooq, atugassarititaasunik aalajangersaassapput.

Piffissaq avatangiisini alapernaarsuiffiususaaq, pissutsit attuumassuteqartut tamaasa ataatsimoortillugit naliliineq tunngavigalugu, Naalakkersuisunit aalajangersarneqassaaq. Tassani ilaatigut

ilaatinneqassapput, ilaatigut avatangiisnik allanngutsaaliuinissaq pillugu, aatsitassanut ikummatissanullu inatsisip siunertaa aammalu pisinnaatitsissummik pigisaqartup mingutsitsinaveersaarnissaa aammalu allanik avatangiisini ajoqusiinaveersaarnissaa killilersuinissalu, tamatumunngalu tarsiinissamut akisussaasuuneq pillugit, aatsitassanut ikummatissanullu inatsimmi aamma akuersissummi aalajangersakkat. Piffissaq Perioden for GME-ip avatangiisini alapernaarsuiffigisassaa, piiaanermik ingerlataqarneri naammassineqareernerisa aammalu aatsitassarsiorfiup matuneqareernerata kingorna, ukiorpassuusinnaavoq. Avatangiisini alapernaarsuinerup takutippagu mingutsitsisoqarsimasoq, GME pisinnaatitsissummik pigisaqartut, aatsitassanut ikummatissanullu inatsimmi aamma akuersissummi tamanna pillugu aalajangersakkat malillugit, mingutsitsinermut taarsiinissamut akisussaasuusaaq.

Tamatuma saniatigut, GME pisinnaatitsissummik pigisaqartut, aatsitassarsiorfiup matuneqarneranut atatillugu matusinermi, saliinissamilu iliuusissanik piumasarineqartunik suliaqarsimasoq, Naalackersuisut akuersisussaavaat.

Tassungu atatillugu, Naalackersuisut aamma taamatut akuersissuteqarnissamut atugassarititaasunik aalajangersaassapput, ilanngullugu assersuutigalugu, qularnaveeqqusiinerup tamakkiisumik ilaannaasumilluunniit attanneqarnissaa pillugu, atugassarititaasut. Naalackersuisut naliliippata, kingusinnerusukkat aatsitassarsiorfiup matoreernerata kingorna mingutsitsisoqarsinnaanera piviusumik aarlerinaateqartoq, pingaartumik tamanna naleqqutissaaq.

2. Mingutsitsisoqassagaluarpat saliinissaq suli aallartinngitsoq, GME akiliisinnaajunnaassappat, tamatuma malitsigisaanik, kina saliisussannngortitaassava?

Mingutsitsisoqarnerata kingorna, saliinissaq sioqqullugu GME akiliisinnaajunnaassagaluarpat, aammalu GME-p akiliisinnaajunnaarnermi pigisaanni matussutissaqanngippat, taamaattoq suli GME saliinissamut akisussaasuusaaq. Saliineq GME-p akiliisinnaajunnaarnermi pigisaanit ingerlanneqarsimannngippat, saliineq EME-mut akiligassannngorlugu Naalackersuisunit ingerlanneqassaaq. Qularnaveeqqusiineq, GME-p ingerlatanik matusinissamut aammalu GME-p pisussaaffinik naammassinninnissamut qularnaveeqqusiussaa, tamatumunnga atorneqarsinnaassaaq. Saliinissamut suli naammattunik aningaasassaqarsimannngippat, aningaasartuutit nunap karsianit matussuserneqassapput.

3. Piiasussaasunnngortitaanermut akuersinermut atatillugu, aningaaserivimmuut inissitassanik qulaqqeerinnissutinik

aningaasanik qassinik, GME immikkoortitsissasoq aalajangerneqarpa?

GME piiaanissamut akuersissut malillugu pisinnaatitsissummik pigisaqartutut, aatsitassanut ikummatissanullu inatsit, akuersissut aamma Naalackersuisut GME-p akuersissut malillugu ingerlatassanut pilersaarutaanik akuersissuteqarnerat malillugit, GME-p pisussaaffiisa naammassineqarnissaannut qularnaveeqqusiisussaavoq. Qularnaveeqqusiineq ilaatigut aamma aatsitassarsiorfiup matuneqarnissaanut tamatumalu kingorna avatangiisini alapernaarsuinissamut (avatangiisit malinnaaffigineqarnerat) tunngatillugu GME-p pisussaaffiisa naammassineqarnissaannut, tunngassuteqartussaavoq.

Qularnaveeqqusiineq nalinginnaasumik aningaasanik imaluunniit pappiaqqanik nalilinnik akuerisanik, (assersuutigalugu danskit naalagaaffimmi obligationii) aningaaserivimmi kontumi toqqorsiviusumi toqqorsinikkut, ingerlatseqatigiiffiup qullersaqarfiata qularnaveeqqusiineratigut aamma /imaluunniit taamaaqataanik qularnaveeqqusiinikkut, pisussaavoq. Qularnaveeqqusiineq Naalackersuisunit akuerineqartussaavoq, tassani qularnaveeqqusiinermut atugassarititaasut aalajangersarneqassallutik imaluunniit akuerineqassallutik.

Naalackersuisut taamaalillutik ilaatigut Aatsitassanut ikummatissanullu inatsimmi §§ 19 aamma 86 malillugu ingerlatassanut pilersaarutip aammalu Aatsitassanut ikummatissanullu inatsimmi § 43 malillugu matusinissamut pilersaarutit akuersissuteqarfigineqarneranni, aningaaserivimmi toqqorsinikkut, aningaaseriviup qularnaveeqqusiineratigut, ingerlatseqatigiiffiup qullersaqarfiusup qularnaveeqqusiineratigut imaluunniit allatut taamaaqataanik qularnaveeqqusiinikkut, qularnaveeqqusiinissaq piumasaaqatigisussaavaat. Taamaattoq qinnuteqaat tamakkiisoq inaarutaasorlu tiguneqarsimatinnagu, aningaasartaasa annertussusissaannut Naalackersuisut isummersinnaangillat.

4. Qulakkeerinninnermut pineqartumut illikartitat sumut atugassiaassappat?

Aningaaseriviup qularnaveeqqusiussaa qularnaveeqqusiisutitut atorneqarsimappat, aningaaseriviup qularnaveeqqusiussaa taamaalilluni aallaaviatigut, akuersissut malillugu, GME-p pisussaaffiinik naammassinninnermi aningaasartuutitut matussusiisussaassaaq, ilanngullugit matusinermi aningaasartuutit aammalu tamatuma kingorna avatangiisini malinnaanermi aningaasartuutit.

5. Narsami eqqaanilu najugaqartunut paasitsitsiniaanissaq qaqugu pissasoq Naalakkersuisut pilersaarutigivaat?

Aatsitassanik Suliassaqarfinnut Avatangiisinut Aqutsisoqarfik VVM-imut nassuiaatit aammalu VVM-imut nassuiaatit oqartussanik suliarineqarnerannut atatillugu, avatangiisini ilisimatuussutsimik tunngaveqartumik siunnersuineq pillugit, paasitsitsiniaalluni ataatsimiititsinernik ingerlatsinissamik, pilersaaruteqarpoq.

Paasitsitsiniaalluni ataatsimiititsinerni siunertaavoq, VVM-imut nassuiaatit aammalu avatangiisinut tunngasortaasa, aatsitassarsiorluni suliassap avatangiisinut sunniinissaannik nalilersuinermini paasinarsisinneqartussat pillugit, aalajangersakkanut ilisimasaqarnerup siammarsarneqarnissaa. Aatsitassarsiorluni suliassaq ilaatigut isumannaallisaaneq, peqqinnissaq avatangiisillu eqqarsaatigalugit isumannaatsumik ingerlanneqarsinnaanersoq, nalilersuisinnaanissamut VVM-imut nassuiaatit iluaqutaapput.

Paasitsitsiniaalluni ataatsimiititsinerit Narsami, Qassiarsummi, Nanortalimmi, Qaqortumi, Igalikumi aamma Narsarsuarmi ingerlanneqassapput.

Siusinnerusukkut paasitsitsiniaalluni ataatsimiititsinerit Naalakkersuisut Kuannersuarnut tunngatillugu, innuttaasunut paasissutissiisarnerit assigiinngitsut 2014-imi, 2015-imi, 2016-imi, 2017-imi aamma 2018-imi ingerlappaat.

Kuannersuarni suliassap suliassamut nassuiaatai aamma avatangiisinut sunniutaasussanik nalilersuinermit (VVM) aamma inuiaqatigiinni piujuartussamik iluaqutaasumik sunniutaasussanik nalilersuinermit (VSB) suliakkiissutitut najoqqutassiat, ulloq 29. August-i aallarnerfigalugu ulloq 6. oktober 2014-ip tungaanut, tamanut ammasumik piareersaataasumik tusarniaassutigineqarput. Naalakkersuisut piareersaataasumik tusarniaanernut atatillugu, 2014-imi illoqarfinni annerusuni, tamatumalu saniatigut 2015-imi Nanortalimmi, Qaqortumi, Narsami aamma Qassiarsummi qinngornernut ulorianartunut pinngoqqaatinut atatillugu, ujarassiormut tunngasortai aammalu avatangiisinut sunniuteqarnissaa pillugit, paasitsitsiniaallutik angalanerit ingerlappaat. Ataatsimiinnerni najoqutarineqartut, paasissutissat aamma nalunaarusiat tamanut saqqummersinneqarput uani www.naal.gl.

Avatangiisinut suliassaqarfimmi 2016-imi ilisimatuussutsikkut nalunaarusiaq, kiisalu Kalaallit Nunaanni aatsitassanik qinngornernik ulorianartunik akulinnik piiannermi avatangiisinut sunniutaasussat pillugit 2017-mi nalunaarusiaq, kikkunnut tamanut paasiuminarsagaq, saqqummersinneqarput. Najoqqutassat Nationalt Center for Miljø og Energi, Aarhus Universitet-imit kiisalu Pinngortitaleriffimmit suliarineqarput.

Aatsitassanik Suliassaqarfimmi Avatangiisinut Aqutsisoqarfik, Nuummi 2017-imi apriliimi, sinerissameersunit aammalu oqarasuaatikkut nunanit allanit peqataaffigineqartumik, soqutigisaqaqatigiiffimmut, aatsitassarsiormermit suliasat pillugit paasissutissiilluni oqaloqatigiilluni ataatsimiinnermik, ingerlataqarpoq. Aatsitassanik Suliassaqarfimmi Avatangiisinut Aqutsisoqarfiup tamatuma saniatigut, 2017-imi nakkutilliilluni takusaanermut atatillugu, Narsami paasissutissiilluni ataatsimiititsineq, ingerlappaa.

6. **Sermitsiami nr. 32-mi, 2015-mi, qupp. 14-15-imi atuarneqarsinnaavoq, aatsitassanik piiasoqalissappat, Kuannersuit atinguanniittoq savaateqarfik Dyrnæs-gården namminerisamik pigineqartoq, tassatuaasoq taarsiissuteqarneq aallaavigalugu pisortanit pigineqalertussa.**

Tamanna suli aalajangiusimaneqarpa?

Oqaatigineqassaaq Sermitsiami ilanngutassiaq, GME-p oqaaseqarneranit aallaaveqarmat.

Naalackersuisut tamanna pisariaqartinneqarpat, aatsitassarsiormermit suliaqarnissaq siunertaralugu, Aatsitassanut ikummatissanullu inatsimmi § 93 naapertorlugu, pigisanik aalaakkaasunik arsaarinnissuteqarnermik aallartitsisoqassasoq, akuerisinnaavaat.

Aatsitassanut ikummatissanullu inatsimmi § 93-imi, imm. 2 naapertorlugu, pigisanik aalaakkaasunik arsaarinnissuteqartoqassappat, tamanna pigisanik aalaakkaasunik arsaarinnissuteqartarneq pillugu, Inatsisartut inatsisaanni maleruagassat malillugit, pissaaq.

Pigisanik aalaakkaasunik arsaarinnissuteqartarneq pillugu, Inatsisartut inatsisaat malillugu, inooqatigiit ataatsimut iluaqutissaat siunertaralugu pisariaqartinneqarpat, tamakkiisumik taarsiissuteqarnikkut, pigisanik aalaakkaasunik arsaarinnissuteqanissamik, Naalackersuisut aalajangiisinnaapput.

Pigisanik aalaakkaasunik arsaarinnissuteqarnissamut piumasaqaatit naammassineqarsimappata, aammalu tamanna pillugu Naalakkersuisut aalajangiissappata, innuttaasoq kalluarneqartoq qanoq annertutigisumik taarsiivigineqarnissamik piumasaqaateqassanersoq, pisuni ataasiakkaani tamaginni ataasiakkaatigut, naliliineq apeqqutaasussaavoq.

Innuttaasut sorliit pigisanik aalaakkaasunik arsaarinnissuteqartarneq pillugu maleruagassat malillugit taarsiivigineqasinnaassanersut, qinnuteqaammik tamakkiisumik inaarutaasumillu tigusaqartoqartinnagu, Naalakkersuisut tunngavilersukkamik isummersinnaangillat.

Naalakkersuisut taamaalillutik Dyrnæs-gården-i imaluunniit allat pigisanik aalaakkaasunik arsaarinnissuteqarfigineqartussanngussanersut, maannakkorpiaq uppersarsinnaangilaat imaluunniit taamaangissorisinnaanagu.

- 7. Narsamiittut taassumalu eqqaaniittut illuutillit pigisaasa taarsiissuteqarneq aallaavigalugu pisortanit pigineqalernissaannut qanoq periarfissaqarpa?**

Takuuk apeqqummut 6-imut akissut.

- 8. Narsarmi eqqaanilu innuttaasut napparsimalissagunik, tamatuma uranimik akulinnik aatsitassanik piiaanermiit pissuteqarsinnaanera, namminneerlutik uppersarsassavaat?**

GME-ip Kuannersuarni aatsitassanik uranimik akulinnik piiaanerani, najukkami innuttaasut peqqissusaat aatsitassanut ikummatissanullu inatsimmi, GME-mut piiaanissamut akuersissummi aammalu GME-ip ingerlatassanut pilersaarutaannut Naalakkersuisut akuersissuteqarneranni tamanna pillugu aalajangersakkanit, illersorneqassaaq. GME-p Kuannersuarni aatsitassanik qinngornernik ulorianartunik akulinnik piiaaneranut atatillugu ingerlatassat, innuttaasut peqqissusaat ilaatigut eqqarsaatigalugu isumannaatsumik ingerlanneqartussapput. Ilaatigut aatsitassanut ikummatissanullu inatsimmi § 1, imm. 2, § 51, imm. 2, nr. 1, 63, imm. 1, nr. 3, aamma § 68, nr. 1 malillugit tamanna pisussaavoq.

§ 51, imm. 2, nr. 1 malillugu, §§ 51-54-imi avatangiisinik illersuinissaq pillugu aalajangersakkani ilaatigut siunertaavoq, ingerlatanit inuit peqqissusaanni navianartorsiortitsiviusinnaasunit mingutsitsinermik allatigullu, sunniinernik pitsaaliuinissaq, killilersimaarinissaq akiuiniarnissarlu. § 63, imm. 1, nr. 3 malillugu, §§ 63-66-imi avatangiisinut akisussaaffeqarneq pillugu aalajangersakkani ilaatigut pinngortitami, ilanngullugit inuit, mingutsitsineq imaluunniit allatigut sunniinerlunnerit, pineqartunut ilaapput.

§ 68, nr. 1 malillugu, §§ 67-72-imi pisinnaatitsissummik pigisaqartup taarsiinissamut akisussaassuunera pillugu aalajangersakkan, i ilaatigut akuersissut malillugu ingerlatanik pisinnaatitsissummik pigisaqartup

suliarinninnerata malitsigisaanik nunami, imermi imaluunniit silaannarmi mingutsitsinerup inunnuk ajoqusiineq aammalu pilersuisumik annaasaqarneq, pineqartunut ilaapput.

Kuannersuarni uranimik allanillu aatsitassanik qinngornernik ulorianartunik akulinnik piiaanermut atatillugu, GME-p ingerlataannut Naalakkersuisut nakkutilliisuupput. Naalakkersuisut taamatut nakkutilliisussaanagerat, atsitassanut ikummatissanullu inatsimmi § 86, imm. 2 malillugu pisussaavoq.

Najukkami innuttaasuni napparsimasoqalerpat, aatsitassanik uranimik akulinnik piiaanermut pilersinneqarsimasinnaasunik, Naalakkersuisut tamanna GME-p ingerlataannik nakkutilliinerminut atatillugu, misissussavaat. Naalakkersuisut misissuinerisa takutippassuk, GME-p aatsitassanik uranimik akulinnik piiaanera najukkami innuttaasut napparsimalernerannik malitseqarsimasoq, GME najukkami innuttasuni taamatut napparsimasoqalermisaa pinngitsoortinniarlugu killilersimaarniarlugulu iliuusissanik aalajangersaassanersoq aammalu ingerlatanik suliaqassanersoq, Naalakkersuisut aalajangiissapput.

Narsami innuttaasut, napparsimaneq aatsitassarsiorfimmit mingutsitsisimasinnaanermik pissuteqartoq, nalinnginnaasumik uppernarsaasussaassapput. Taamaattoq mingutsitsineq pisinnaatitsissummik pigisaqartup mianersuaalliorluni pissusilersorneranik pissuteqartoq, innuttaasut uppernarsaasussaassanngillat, tassami pisinnaatitsissummik pigisaqartut aatsitassanut ikummatissanullu inatsimmi § 69 malillugu, avatangiisini ajoqusiinermut kinaassusersiunngitsumik akisussaaffeqartinneqarmata.

9. Kuannersuarni aatsitassarsiorortoqalissappat tamatuma pitsaanngitsumik kingunerisinnaasaannut akisussaaffik, Naalakkersuisut tamakkiisumik iperarnerpaat, taamalu Narsami taassumalu eqqaani najugaqartunut atugassarititaasut, GME-mut akisussaaffinngortillugit?

Naalakkersuisut, Kuannersuarni aatsitassarsiorfeqalersimasinnaanerani sunniinerlunnernut sunulluunniit, akisussaaffimmik iperaanngillat.

Aatsitassanut ikummatissanullu inatsit malillugu, piiaanermik suliaqarnerit imaluunniit iliuuseqarnerit tamatuminnga siunertaqartut GME akuersissummik pissarsisimanngippat imaluunniit tamatumunnga Naalakkersuisut akuersissuteqarsimanngippata, aallartinneqaqqusaanngillat. Naalakkersuisut taamatut akuersissummik tunniussinermut akuersissuteqarnenullu atatillugu, pisinnaatitsissummik pigisaqartup ingerlatanik suliaqarnerminut atatillugu malitassaannik, atugassarititaasunik aalajangersaasinnaapput aalajangersaaniarlutillu. Naalakkersuisut pisinnaatitsissummik pigisaqartup inatsisinik aammalu atugassarititaasunik aalajangersarneqartunik naammassinninnera

ingerlaavartumik nakkutigissavaat. Naalakkersuisut paasigunikku, inatsisit atuuttut imaluunniit atugassarititaasut Naalakkersuisunit aalajangersagaasut unioqquatinneqarsimasut, Naalakkersuisut unioqquitsinermut taamaattumut naleqquttumik, akuliutissapput.

Naalakkersuisut aamma allatigut aatsitassarsiorfik malinnaaffigissavaat, aammalu pisinnaatitsissummik pigisaqartut Naalakkersuisunut pissutsit assigiinngitsut pillugit ingerlaavartumik, nalunaarusiortartussaapput. Naalakkersuisut aatsitassanut ikummatissanullu inatsit malillugu, pissutsit assigiinngitsut pillugit akuliunnissamut aalajangiinissanullu arlalinnik piginnaatitaaffeqartinneqarput. Assersuutigalugu avatangiisini ajoqusiinernik imaluunniit tamatuma navianartorsiorterujussuarneqarneranik pisoqarpat, iliuusissat suut aallartinneqassanersut, Naalakkersuisut aalajangiisussaapput. Takuuk aatsitassanut ikummatissanullu inatsimmi § 66.

Aamma takuuk apeqqummut 2-imut akissuteqaat pisinnaatitsissummik pigisaqartoq akiliisinnaajunnaarluni pisoqarneranut tunngassuteqartoq. Tamatuma saniatigut takuuk apeqqummut 8-imut akissuteqaat.

10. Naalakkersuisut qulakkeerumavaat, akuutissat toqunartullit piffissami sivisuumi aatsitassarsiorfiup eqqaani katersuukkiartorsinnaanerat, Narsami eqqaanilu innuttaasut ernummatigissanngikkaat?

Kuannersuarni suliassaq 29. august - 6. oktober 2014 tamanut ammasumik piareersaataasumik tusarniaassutigineqarpoq.

Tamanut ammasumik piareersaataasumik tusarniaanermi VVM-imik suliaqarnermut (suliakkiissutinut najoqqutassiaq) suliassap nassuiaataani allassimavoq, ilaatigut pillugu ajornartorsiutit VVM-mut nassuiaammi ilaatinneqassasut. VVM-mut nassuiaammi aamma ingerlatseqatigiiffiup qinnuteqartup suliniutip immikkoortuini tamaginni avatangiisini ajornartorsiuteqalernissat pakkersimaarnissaannut iluarsisarnissaannullu iliuusissanik qanoq aallartitsiniarnersoq nassuiarneqartussaavoq, ilanngullugu aatsitassarsiorfiup matoreernerata kingorna.

Kuannersuarni suliassamut tunngatillugu avatangiisinit tunngasut tamarmik avatangiisini sunniutaasussanik nalilersuineranut nassuiaammi inatsimmi pisussaaffiliussami (VVM-mut nassuiaat) sammineqartussaapput. VVM-mut nassuiaat minnerpaamik sapaatit akunnerini 8-ini tamanut ammasumik tusarniaassutigineqartussaavoq.

Tamatuma saniatigut tamatuma kingorna akuersissummik tunniussinermi aamma akuersissuteqarnermi Naalakkersuisut atugassarititaasunik, ingerlatseqatigiiffiup malitassaannik, aalajangersaasussaapput. Atugassarititaasut taakkua malinneqarnerat nakkutigineqartussaavoq, qularnaveeqqusiussaq ingerlatanut naleqqussagaassasooq piumasaqaatigineqarpoq, aammalu Naalakkersuisut peqqusissuteqarsinnaapput tamatuma kingorna pineqaatissiviusussanik.

Ilanngullugu Naalakkersuisut akuersissutit aamma akuersissuteqarnerit
tunuartissinnaavaat.

Inussiarnersumik inuulluaqqusillunga



Erik Jensen
26-10-2018